



Selasa, 12 September 2023
Ogen: Ulangan 31:7-8



"Mpetetap Ukur"



Sada hal si perlu i bas geluh enda eme ketetapan pusuh-ukur. Ketetapan pusuh bage pe ukur mempengaruhi ku bas caranta mperjuangkan sada-sada hal; umpamana: kalak si menaken usaha, adi kurang tetapna ukurna banci saja usaha e kurang berhasilna erkiteken ukur bera-bera; entah pe bagi kalak si atena lawes erjabu, perlu kal ketetapan pusuh rikut pe ukur; bagi kalak si ipercayaken lako ndahiken sada dahin kepengurusen, perlu bas kalak e lit ketetapan pusuh, maka dahin e ngasup nge ia ndalankenca. Bage me perluna ketetapan pusuh lit bas diri tep-tep kalak, ibas ia ndalani kegeluhen enda. Bas Pustaka Si Badia pe melala dituriken kerna Dibata mpetetap ukur anak-anakNa, NabiNa (kalak si isuruhNa); salah sada eme ogenta bas wari enda. Arah suruh-suruhanNa Musa, Dibata mpetetap ukur Josua lako ndahiken dahin si ipercayaken man bana, eme maba Bangsa Israel berkat ku tanah si ipadanken Dibata man bangsa e. Musa ngidah litna keragu-ragun bas diri Josua tupung dahin e iampeken man bana.

*"**Tetapkenlah ukurndu janah teklah;** kam me si mabai bangsa enda guna ndatken negeri si ipadanken Tuhan man nini-ninina. **Tuhan kap si mabai kam ras si nemani kam.** La kam juru ibahanNa la kam itadingkenNa".* Kalimat si peseh Musa man Josua, erbahanca reh tetapna ukur dingen tek Josua lako ngayuken dahin si mbelin e. Ketetapan ukur ras kiniteken e merupakan sada hal si iperluken kalak si ndahiken dahin si mbelin. Bas perdalanen geluh ta pe banci saja megati kurang tetapna ukur ta bahanlah kata Dibata e simpetetap ukur ta. Tugasta ku ja pa pe jadilah kalak si mpetetap ukur kalak sideban.